



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Parlamentu Nasionál**  
**16 Janeiru 2018**

**Situasaun Impase Polítika atuál no solusaun posível tuir Konstituisaun**

Dezenvolvimentu situasaun polítika atuál depoisde eleisaun jerál parlamentár 2017 nian to’o ohin loron kontinua iha inserteze no hamosu interpretasaun oinoin ba Konstituisaun nune’e hamosu konfuzaun ba públiku. Situasaun ne’e nia impaktu boot liu ba funksionamentu instituisaun Estadu iha setór oioin partikularmente iha Parlamentu Nasionál.

Situasaun hirak ne’e inklui Parlamentu Nasionál la konsege aprova orsamentu retifikativu ne’ebé ajusta orsamentu jerál tinan 2017 hodi bele asegura mákina administrasaun no rezolve dívida Governu anteriór nian.

Aleinde ne’e, Governu foun mós la bele kontinua hala’o ho di’ak administrasaun Estadu nian tanba la iha orsamentu Estadu. Tuir prátika konstitusionál, Governu só bele apresenta orsamentu Estadu bainhira programa governu hetan aprovasaun iha Parlamentu Nasionál.

Depoisde apresentasaun programa faze dahululuk nian hetan rejeisaun iha 19 Outubru 2017 iha Parlamentu Nasionál, Governu la apresenta tan programa faze daruak ba Parlamentu Nasionál to’o ohin loron bainhira tuir rekizitu konstitusionál sira.

Durante período ida-ne’e, JSMP observa katak funksionamentu órgaun sira Estadu nian, partikularmente Parlamentu Nasionál, la funsiona tuir Rejimentu Parlamentu (Lei Nú. 15/2009 ne’ebé altera ho Lei Nú. 1/2016) no mós dala barak la halo diskusaun ne’ebé sériu ba interese nasional. Saida mak akontese iha Parlamentu Nasionál só iha de’it debate polítiku ba interese polítiku partidáriu.

Tendénsia diskusaun sira ne’ebé populár liu iha Parlamentu Nasionál mak mosaun rejeisaun ba programa Governu Konstitusionál VII, mosaun rejeisaun ba Orsamentu Retifikativu, apresentasaun mosaun sensura, pedidu destituisaun ba Prezidente Parlamentu Nasionál, la iha plenária no enkontru regulár Komisaun Permanente sira hahú hosi inísiu tinan fiskál 2018 nian, inklui ezijénsia ba rejignasaun Primeiru Ministru no Prezidenti Parlamentu Nasionál atuál. JSMP konsidera situasaun ne’ebé grave liu mak liu ona loron neen-nulu (60) resin ka fulan tolu (3) Parlamentu Nasionál la diskute no aprova Orsamentu Estadu ba tinan fiskál 2018 nian.

“Normalmente iha polítika, situasaun sira hanesan ne’e bele akontese, maibé JSMP hanoin katak ba interese nasional dalan ideál liu mak atu bele buka atu fó solusaun ida-ne’ebé bele hakotu situasaun impase polítika ne’e ho kontribuisaun parte hotu-hotu nian, liu-liu Prezidente Repúblika atu bele ezerse nia kompeténsia tuir Konsitituisaun no nia prudénsia hodi hakotu situasaun ida-ne’e”, dehan Diretór Ezekutivu JSMP, Luis de Oliveira Sampaio.

Rua Beco Lakateu, Aldeia Manu fuik, Suku Colmera, Administrativu Vera Cruz  
Dili Timor Leste  
PoBox: 275 Telefone: 3323883 | 77295795  
www.jsmp.tl [info@jsmp.tl](mailto:info@jsmp.tl)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl

Tuir loos iha situasaun hanesan ne'e, bazeia ba Artigu 86 alinea f) Konstituisaun, Prezidente Repúblika iha kompeténsia liuhosi rona partidu sira iha asentu parlamentár no Konsellu Estadu, bele dissolve Parlamentu Nasionál.

Razaun fundamentada mak, hahú hosi data tomada pose ba deputadu sira Lejizlatura IV nian iha 5 Setembru 2017 to'o ohin loron (loron sia-nulu resin ona), situasaun iha Parlamentu Nasionál la permite atu Parlamentu Nasionál diskute no aprova Orsamentu Jerál Estadu 2018 nian.

*“f) Dissolver o Parlamento Nacional, em caso de grave crise institucional que não permita... a aprovação do Orçamento Geral do Estado por um período superior a sessenta dias, com audição prévia dos partidos políticos que nele tenham assent e ouvido o Conselho do Estado, sob a pena de inexistência juridical do acto de dissolução, tendo em conta o disposto no artigo 100º. “*

Iha kontestu ida ne'e, Prezidente Repúblika la nesesariamente hein to'o fulan neen (6) liu mak dissolve Parlamentu tuir kondisaun ne'ebé prevee ona iha Artigu 100 Konstituisaun, tanba situasaun ne'e tama ona kategoria krize institusionál ne'ebé grave.

Tuir Artigu 86 (f) Konstituisaun defini katak iha rekizitu rua kona-ba oinsa atu konsidera katak instituisaun estadu sira tama iha kategoria krize institusionál grave:

1. Se la iha formasaun governu, ka
2. Se PN la aprova orsamentu jerál estadu.

Iha âmbito rekizitu rua ne'e, se ida prevalese, Prezidente Repúblika bele deside atu dissolve Parlamentu Nasionál no esplora opsaun sira ne'ebé posível atu hakotu empase polítika iha Parlamentu Nasionál. Rekizitu rua ne'e la aplika komulativamente, maibé Prezidente bele halo desizaun ruma se entre rekizitu rua ne'e ida akontese.

Defaktu ita konsege forma duni governu ida ho karáter governu minoritáriu, maibé to'o agora, Parlamentu Nasionál la konsege debate no aprova orsamentu jerál estadu tuir rekizitu artigu 86 (f) Konstituisan. Tuir artigu ne'e fó limitasaun tempu ba Parlamentu Nasionál atu iha loron neen-nulu (60) nia laran aprova ona Orsamentu Estadu. Limitasaun ne'e ho intensaun atu prevene krize polítiku ne'ebé naruk hodi fó impaktu ba funsionamentu Estadu tanba la iha orsamentu.

Ita hotu observa katak liutiha ona loron neen-nulu (60) maibé Parlamentu la aprova programa governu, nune'e Governu la bele apresenta Orsamentu Jerál Estadu 2018 ba Parlamentu Nasionál. Atrazu ida-ne'e fó impaktu maka'as no sériu ba funsionamentu Estadu no nia prosesu la tuir ona Konstituisaun.

Haree ba realidade ne'e, JSMP rekomenda ba Prezidente Repúblika atu bele uza nia kompeténsia konstitusionál ho nia matenek no prudénsia atu bele foti desizaun ida ne'ebé justu, nune'e bele evita atu ita tama iha sirkúlu visiozu (*lingkaran setan*) ida ne'ebé ita nunka atu sai iha ne'ebá.

Atu hetan informasaun liutan halo favór kontaktu:

Luis de Oliveira Sampaio  
Diretór Ezekutivu JSMP  
Email : [luis@jsmp.tl](mailto:luis@jsmp.tl)